



COMUNICÂT STAMPE

COMUN DI UDIN



RESCJ DI UN CJASOT PROTOSTORIC INTAI SGJÂFS ALÌ DI PALAÇ DORTA A UDIN

Dilunc dai lavôrs di restaur conservatîf dal storic **Palaç Dorta a Udin**, che in curt al tornarà a slusî cemût che al jere intal passât par iniziative dal imprenditôr Alessandro Salvatelli, a son vignûts fûr **rescj archeologjics de epoche protostoriche fin ae etât moderne**, che a fasin viodi novitâts di interès storic grant. Ducj i lavôrs di sgjâf si davuelzin sot dal control archeologjic de dite Arxè s.n.c., par cure dal dot. Giulio Simeoni, e cu la direzion sientifiche dal funzionari archeolic Giorgia Musina pe Sorintendence Archeologjie, bielis arts e paisaç dal Friûl-Vignesie Julie.

Dopo vê cjatât intal Dicembar dal 2019 structuris murariis di epoche romane republicane (prin secul prin di Crist - prin secul dopo di Crist), la setemane passade, intant che si fasevin i lavôrs pe preparazion de rimesse sot tiere, a son vignûts fûr gnûfs rescj che a partegnin ae za cognossude vile fortificade protostoriche dal secont e prin mileni prin di Crist. Inte aree de rimesse, cun di plui, ancje se fin cumò no son

stâts cjatâts elements relatîfs aes fasis romanis e medievâls, in chescj dîs al è stât cjatât ancje un **poç** di muradure dal timp dal **Rinassiment**, di plui o mancun un metri e mieç di diametri.

Un **aprofondiment stratigrafic**, domandât de Sorintendence ABAP F-VJ e autorizât de comitence, al è stât duncje necessari par vie de ecezionalitât dai elements vignûts fûr dilunc dal control. Ancje se fin cumò al è stât gjavât fûr dome un toc di un pavimento in tiere batude cui rescj di un probabil fogolâr e di elements strutturâi (tant che il segn di un diurint di len), al è verisimil podê identificâ il dut cun ce che al reste di un cjasot, che lis sôs **cundizions ecezionâls di conservazion** a son un *unicum* intal panorame citadin.

Tal dipuesit archeologic si cjate ancje une quantitât discrete di tocs di ceramiche, e cualchidun di chescj al testimonee contats slargjâts cu la aree de Europe centrâl. Il studi di chescj reperts al permetarà di precisâ la datazion dal contest individuât. Par cumò la strutture abitative e somearès databile ae **Etât dal Bronç Resinte, tra il 1300 e il 1200 prin di Crist**.

“Tant che sindic di Udin e tant che furlan - al à comentât Pietro Fontanini - o cjapi cun sodisfazion la gnove di cheste scuvierte impuartante che e conferme no dome la presince tal nestri teritori, za te Etât dal Bronç, di popolazions une vore evoludis, tant che testimonee de finece dai reperts cjatâts, ma che ancje nus fâs viodi cemût che za in chês epoche la zone e fos une des principâls croseris comerciâls in Europe. Sperin che i lavôrs nus tornin indaûr altris sorpresis”.

In graciis dal impegn gjenerôs de comitence, di fat, si previôt la **continuazion dai sgjâfs** che a podaran furnî elements gnûfs pe interpretazion juste des sucessions stratigrafichis, significativis par capî miôr il disvilup des fasis de vite dal abità protostoric di dulà che e à vude origjin la citât di Udin.

Chescj lavôrs di restaur conservatîf intal palaç storic logât da pît dal Cjistiel, propit intal cjanton di androne Sottomonte viers place Libertât, a puartaran ae realizazion di **unitâts abitativis di cualitât** che a puedin coniugâ l'incjant dal passât cu lis comoditâts des plui **modernis tecnologjiis abitativis**.

Traduzione a cura di

ARLeF

Agjenzie Regjonâl pe Lenghe Furlane

via della Prefettura, 13

33100 Udine

tel. +39 0432 555812

email: arlef@regione.fvg.it

pec: arlef@certgov.fvg.it